



Apabila Sukarno memberi ucapan mengenai kuasanya berbalik kepada kuasa 1945 maka di Medan, harus pula, di seluruh Indonesia segala kenderaan disuruh berhenti untuk mendengar pidato Presiden itu. Yang mana-mana sudah jelek mendengar pidato Presiden itu, kerana dipaksa mendengarnya, khabarnya ada yang mengambil kapas untuk menutup telinganya kerana dipaksakan mendengarnya.

* * *

Di negara Indonesia, di sana sini masih huru-hara. Wang negara makin sulit dan sempit tetapi Presiden bersama-sama rombongannya seramai 26 orang berjalan dua bulan mengelilingi dunia. Syabas! Inilah ketua negara yang bertanggungjawab kepada kesejahteraan rakyat, bung! Rakyat menderita ketua negara senang-senang makan angin! Apa kata rakyat Indonesia?

* * *

Ho Chi Minh tatkala melawat Indonesia di hadapan ramai mencium pipi wanita-wanita yang memberi hormat kepadanya. Di lain-lain tempat orang tua ini tidak pernah berbuat demikian. Apakah ini sengaja dibuat untuk Indonesia sebagai satu perbuatan menghina? Ataukah ini sebagai contoh kepada Presiden Sukarno supaya mencium pipi wanita-wanita yang menghormatinya, tidak peduli isteri orang, sebagai ciuman “bapa” kepada “anaknya”?
Wa Allāhu a 'lam.

* * *

Seorang pemuda UMNO mengatakan apabila Parti Islam naik dan berkuasa maka majlis undangan kelak akan jadi suarau¹ dan madrasah. Terlalu bung –

Jawabnya yang tepat untuk ini, bukan untuk semua, bahawa harus pula kalau tidak ada surau dan madrasah pemuda-pemuda harus tidak tahu agama Islam –
Na 'ūdhu billāh bung!

* * *

Dato' Abdul Hamid Jumat sudah dipecat tetapi apabila datang utusan dari ibu pejabat dan dirunding semula – Dato' Abdul Hamid Jumat juga yang naik dan diterima semula sekalipun buat sementara. Ini satu contoh bahawa Jawatankuasa Tertinggi UMNO Singapura masih mentah berfikir – tidak menimbang perkaranya masak-masak – masih banyak sentimennya. Cara ini berbahaya bagi perkembangan UMNO, bung!

* * *

PETIR sekarang ribut-ribut bahawa akhbar-akhbar Inggeris dikatakan menyalahi lawannya dan kerana ini “patut diajar”. Ini satu contoh dan gambaran Bung, kalau PETIR berkuasa ertinya semua mulut ditutup kesudahannya apa yang dibuat PETIR kelak telan sahaja.

* * *

Seorang sosialis, tatkala berucap di Kedah, menyatakan bahawa jika sosialis memegang tampuk pemerintahan maka ertinya syurga kepada manusia. Syurga tidak syurga belum tahu bung selagi kekuasaan belum di tangan tetapi bagi orang-orang yang dikehendaki mereka bukannya syurga dunia seperti yang dimaksud oleh orang-orang sosialis itu, mereka berkehendak syurga dunia dan akhirat sebab mereka tahu bahawa mereka akan mati tetapi faham dan pengertian orang sosialis, entahlah! Orang Islam yang sebenarnya Islam yang dicari mereka adalah semata-mata keredhaan Tuhan yang menjanjikan syurga bagi orang-orang yang beriman kepada-Nya. Bagi orang sosialis ke mana sudahnya, entahlah sedang kalau mau tau lebih lanjut, tanya sama –

Cemeti al-Farouk.

¹ surau